

REGIONAL NEWS

RODENT OUTBREAK

Kumina Thingtam lo thlengah Mizoram district 11-a kuthnathawktu chhungkua 5,317-te buh leh bal leh thlai thar tur beisei atanga za zela 42 point 06 chu sazu puangin an seh zawhsak.

Agriculture & farmers' welfare department hotute hnen atanga thu dawn danin rawthing tamin a hrin nasa taka sazu puang hian khaw 180 a nghawng a. Buh tin 4,307 hmun an seh zawhsak a ni. Mamit district-ah a tuartu chhungkua an tam ber a, kuthnathawktu chhungkaw 2,009 zetin thlawhhma a tihchhiatsak a, an thar tur ang an thar phak loh tura chhut hi za zela 60 a ni . Lunglei district-in dawtin chhungkaw 1,071 in an thlawhhma a an thar tura beisei an phak lohna tur chu za zela 60 point 70 a ni. An thar chhuah tura chhut thar pha lo nasa ber leh sazu puangin thlawhhma a tihchhiat nasat ber chu Hnahthial district a ni a, chhungkaw 110 te thlawhhma a an buh leh bal leh thlai chi hrang hrang za zela 82 point 9 zet sazu hian a seh zawhsak a. Saitual district-ah pawh kuthnathawktu chhungkaw 313 te buh leh bal leh thlai chin za zela 63 point 40 a tihchhiatsak vek a ni.

Agriculture & farmers' welfare department hotute sawi danin sazu puang hian buh thar an seh nasa ber a. Chu bakah thlai dang- vaimim, fu, behlawi, sawhthing, bawkbawn, hmarcha, mai, chhawhchhi, dawnfawh leh fanghma te pawh an seh tho a ni. Sazu suatna atan hian Mizo thang chi hrang hrang bakah sazu tur hmanga sazu hrai hi khaw hrang hrangah kalpui a ni a, khaw 18-ah erawh chuan khawtlang hruaitu leh loneitute'n an duh loh avangin tur hmanga sazu hrai hi kalpui a ni ve lo. Tun thlenga sazu tur hmanga hrai sazu ruang chhar khawm tawh chu hriat theih chinah 32,375 a ni.

Nikum February thla khan Mamit district-a Hriphaw khua-ah rawthing a tam tan a, nikum vek khan Vaisam (Lunglei Dist) leh Mamit district a khaw 12, Khawrihnim, Dilzawl, Dapchhuah, Kanghmun, Darlung, West Serzawl, Nghalchawm, Hmunpui, Tuirum, South Sabual, Hriphaw, Lungphun khua te bakah Aizawl District ah Lungsei, Samlukhai, North Lungleng ah te rawthing tam hmuh tur a awm zel a. Kum 2025 a lo thlen chuan Mizoram district zawng zawng tuam chhuak in, hriat theih chin ah khaw 147 ah rawthing a tam a ni. Mizoramah hian mau leh rua chi hrang hrang 20 chuang a awm a, heng zingah hian Mautak (Melocanna baccifera) hi a tam ber niin mawu awmna hmun za zela 95 a awh a, a dang zingah chuan Phulrua, Rawnal leh Rawthing te hi a lar zual te a tih theih ang. Rawthing rah/fang hi Mautak rah nen a danglam hle a, a pianhmang leh len lamah buhum a ang hle a, a bawrah a rah te hi awm khawm in, bawr khatah hian fang 150-190 inkar a awm ber thin.

Mautam leh Thingtam a thleng dawn tih hriat lawk theihna pakhat chu rannung puang hi a ni a. Thangnang, khau leh pangang te a puang thin a. Nikum khan Kanghmun, Hriphaw, Tuipuibari, Rawpuichhip leh Tachhip ah thangnang a kai thu report dawn a ni a. Kuminah khaw 46 ah thangnang a puang a, Champhai leh Khawzawl District ah erawh hmuh a ni ve lo.

HEALTH FOR AGED

Vawiin chawhma dar 11:00 khan Vaivakawn Cultural Centre cum Auditorium ah Upate tana Hriselna Kut chu Directorate of Ayush leh Mizoram Upa Pawl tangkawpin an buatsaih.

Aizawl West area chhunga MUP branch 17 atangin MUP member te an rawn kalkhawm a. He hunah hian upate tana hriselna tihthat na'n leh vawnhim na'na thil pawimawh tak tak sawi ho in in zirtir na hun neih a ni a. Upa ten natna chi hrang hrang an neihte leh a in enkawlina te zirtirna hun hman a ni bawk a. Hun hman zawhah a thlawna in entir na hun buatsaih a ni a, inentir te hnenah Ayush damdawi a thlawna pek vek an ni. Dr. S. Mara Thansiami , Mission Director, National Ayush Mission leh Deputy Director, Directorate of Ayush chuan khuallian niin a hmanpui a. MUP chairman Pu Nghaklianmawia'n inlawmna thuchah a sawi a. Dr. H. Malsawmtluangi, Consultant, Directorate of Ayush leh Dr. Jonathan VL Tlankima, Medical Officer te'n kalkhawmte hriselna chungchangah zirtirna an nei a, kalkhawmten an hlawkpui hle a. Awlsam taka taksa insawizawi na hun te neih a ni bawk.

<><><>

LADC

Kar leh Nilaini a member 25 awmna Lai Autonomous District Council (LADC) inthlan lo awm tur atan a hman tur EVM chu nimin khan hman tura peihfel a ni ta.

Nimina Lawngtlai DC Conference Hall a EVM commissioning hunah hian bawrsap Pu Donny Lalruatsanga District Election Officer (DEO) ni bawk bakah Pu Abraham Beirazi Khithie (Observer), Election Officer Pu Collin Hlychho, leh Election Official dangte bakah political party hrang hrang aiawh te an tel a ni.

Lawngtlai District - a Polling Station - 111 leh Auxiliary Polling Station 1 a hman tur Electronic Voting Machine (EVM) Control Unit (CU) leh Balloting Unit (BU) ruatfel tawhte chu EVM Commissioning-ah hian inthlan ni a hman theih tawh turin buatsaih fel an ni a. EVM khawl buatsaihna buaipui tur hian Bharat Electronics Limited (BEL), Bangalore, atangin Engineer-te an lo tel a ni.

He inthlan lo awm tur atan a inbuatsaihna kal zelah nimin vek khan inthlanna a duty tur official leh Driver ten Lawngtlai DC Office Complex-a Postal Ballot Facilitation Centre-ah vote an thlak.

Nimin chawhma dar 11:00 AM atanga tlai lam dar 4:00 PM thleng khan vote hi thlak a ni a. Vote 107 a tla a. Nimina vote thlak hman lo te hian naktuk Inrinni dar 11:00 AM leh dar 4:00 PM chhungin Postal Ballot Facilitation Centre-ah tho an thlak chhunzawm leh dawn a ni.

<><><>